



Mahein nia Lian Nú. 41, 30 Outobru 2012

## Konsolidasaun Instituisaun F-FDTL<sup>1</sup> Liu Tiha Krize 2006 no Komandante Foun nia Lideransa

### Introdusaun

Instituisaun F-FDTL mai ho nia istoria rasik iha prosesu luta ba libertasaun nasional ne'ebé asume nia responsabilidade ba luta armada no girilia nian durante tinan 24 nia laran. Iha faze indepedensia nian transforma forsa girilia sai hanesan forsa konvensional tuir evolusaun forsa armada nian ne'ebé profesional.

Hafoin transformasaun FALINTIL ba F-FDTL iha tinan 2001 instituisaun F-FDTL simu mandatu konstituisional ida ne'ebé preve iha konstituisaun Repúblika Demokratika Timor-Leste artigu 147. Misaun konstituisional ida ne'e ho dezafiu oin-oin iha nia dezvoltimentu. Estadu buka nafatin solusaun ba dezafiu sira ne'e, partikularmente formasaun no kapasitasaun ba rekursu umanu, investe ba infraestruturá no fasilidade inklui kondisaun sira seluk.

To'o iha tinan klaran 2006 mosu grupu petisionariu sira iha instituisaun F-FDTL ho lamentasaun sira ne'ebé konsidera katak iha diskriminasaun entre elementu F-FDTL. Ikus mai, elementu sira ne'ebé konsidera diskriminadu husik hela sira nia responsabilidade ne'ebé lidera husi eis Tenenti Gastão Salsinha. Mosu mos grupu seluk ne'ebé lidera husi eis Maijor Alfredo Alves hanesan Komandante Polisia Militar (PM) desde Abril 2006.

Buat hirak ne'e nia konsekuensia lori Timor-Leste besik monu ba funu maun-alin, impaktu seluk ne'ebé povu sai deslokadu, lakon riku soin, husik hela nia hela fatin, no povu balu mate. Buat seluk tan maka instituisaun siguransa no defeza partikularmente F-FDTL no Polisia Nasional Timor-Leste (PNTL) se kilat ba malu, implikasaun grave tebes ba instituisaun rua ne'e no besik atu nakfera.

Maibe estadu no governu buka nafatin solusaun atu konsolida instituisaun rua ne'e iha nia dezvoltimentu, lejislasaun, rekursu umanu, infraestruturá no fasilidade sira seluk. Prova estra-ordinariu ida ne'ebé bele komprova kapasidade lider timor oan sira nian maka "Operasaun Halibur" ba grupu petisionariu sira la ho violensia.

Iha Mahein nia Lian ida ne'e halo ánaliza ba konsolidasaun instituisaun F-FDTL hafoin liu tiha krize 2006. Partikularmente iha konsolidasaun no dezvoltimentu instituisaun nian, transformasaun lideransa no Komandante foun nian lideransa iha tinan 2011 ne'ebé Maijor Jeneral Taur Matan Ruak husik hela ba Komandante F-FDTL foun Maijor Jeneral Lere Anan Timur.

---

<sup>1</sup> Forca Armada da Libertação Nacional Timor-Leste – Forca Defesa de Timor-Leste (F-FDTL)

## **Konsolidasaun Instituisaun F-FDTL**

### **1. Lei**

IV governu Konstituisional, iha Abril 2010 liu husi Sekretaria Estadu Defeza (SED) produz lejislasaun importante sira hanesan Lei Organika F-FDTL, Lei Regime Kareira Militar, Lei Disiplina Militar, Lei Siguransa Nasional, Lei Promosaun Militar, Regulamentu Lei Servisu Militar, Konseitu de Empregu, Lei Defeza Nasional, Estrutura Forsa Armada, Tribunal Justisa Militar, no lejislasaun sira seluk.

FM hare katak nu'udar pasu pozitivu ida husi governu hodi kria kondisaun báziku bá forsa armada, liu husi regulamentu hirak ne'e atu bele konduz lala'ok forsa armada ida tuir kuadru juridiku sira ne'ebé hatur hanesan instrumentu ida hodi profesionaliza instituisaun forsa armada no hases husi intervensaun polítika sira. Maibé, sai hanesan dezafiu ida bá elementu forsa armada sira maka kuiñesementu bá lei.

Pontu dezafiu sira ne'ebé FM hare katak lei balu produs iha lian Portugés no elementu balu la konsege komprende lei hirak ne'e ho diak. Dalaruma elementu balu hases nian asaun husi regra juridiku nian haruka. Hanesan elementu F-FDTL baku mate comunidade ho naran Pedro Ricardo iha Laivai (Suku Ililai), Sub-Distritu Lautem, Distritu Lautem ne'ebé hetan reasaun makáas husi Komandante F-FDTL iha momentu ne'eba<sup>2</sup>. Kazu seluk, elementu F-FDTL tiru kareta patrollamentu Polisia Nasional Timor-Leste (PNTL) iha área Likisa<sup>3</sup>, membru Polisia Militar (PM) baku mate ferik Lucia Martins iha Suku Mascarinhas, Juñu 2011, ida tan mak membru PM asaltu prosesaun "Kruz Joven" iha areia Comoro ne'ebé hakanek ema nain 4 kanek todan no ema 1 tama ICU.<sup>2</sup>

### **2. Rekrutamentu**

Hafoin liu tiha krize 2006 rekursu umanu sai hanesan dezafiu ida ba instituisaun F-FDTL nu'udar impaktu mai husi krize polítika no militar iha tinan 2006 ne'ebé elementu F-FDTL lubun boot ida husik hela sira nia responsabilidade ne'ebé lidera husi Tenenti Gastaão Salsinha. Tanba menus rekursu umanu, IV Governu konstituisional liu husi SED investe maka'as ba rekursu umanu iha F-FDTL. Liu husi ejizensia ida husi instituisaun F-FDTL, SED mos konsege halo rekrutamentu elementu foun dala rua mak hanesan, iha 2009 rekruta elementu foun hamutuk 500 resin nomos iha 2011 rekruta tan 500 resin hodi ense fila fali número ne'ebé instituisaun F-FDTL presija, tamba numeru militar hafoin krize hela deit 717, ne'ebé maioria mai husi veteranus sira, ne'ebé número anterior antez krize hamutuk 1.800.<sup>3</sup>

Ba oin to'o iha tinan 2020 governu liu husi SED sei presiza rekursu umanu ho total rekursu umanu mak 3.700, ne'ebé estabesele iha planu F-FDTL no aprova ona husi Governu.<sup>4</sup>

---

<sup>2</sup><http://www.fundasaunmahein.org/2012/08/06/politika-ministeriu-defeza-no-siguransa-periodu-2007-%E2%80%932012/>

<sup>3</sup> Mahein nia hanoin No.2, Politika Ministerio Defeza No Seguransa 2007-2012, pag 7

<sup>4</sup> Sala de redasaun, TVTL. Debate entre Vice-CEMGFA Brig.Gen. Filomeno Paixao no Diretor FM Sr. Nelson Belo. Kinta 23/08/201

Planeamentu ba total rekursu umanu ne hatama iha Dokumentu 2020, tamba dokumentu Forsa 2020 maka define dalan importante ne'ebé orienta dezenvolvimentu forsas armadas nian ba oin. Ho nia objetivu maka dezenvolvimentu forsa ida ke professional neneik, mas bebeik no lori tempu naruk.<sup>5</sup> Maibe importante maka ita presiza liu rekursu umanu ne'ebé qualidade no profesional, signifika katak forsa ne'ebé kaer metin disiplina, respeita direitus umanus no prosedimentu seluk ne'ebé hatur iha natureza militar.<sup>6</sup> Atu nune'e bele hametin liu tan servisu institusaun FALINTIL-FDTL nia, tuir komponente ida-idak nia servisu no inklui mos atividade importansia maka hanesan atividade CIMIT.

### 3. Formasaun

Governu nia esforsu investe makáas iha rekursu umanu, atu bele kompleta nesesidade hirak ne'e nu'udar ezijensia ida husi instituisaun F-FDTL, esforsu estadu nia liu husi governu oferese oportunidade bá ofisiais, sarjentu no soldadu sira husi instituisaun F-FDTL hodi tuir kursu iha rai laran no liur tuir área ne'ebé prioridade no nesesita bá instituisaun F-FDTL. Governu halo ko'opera ho nasaun portugal hodi fo formasaun ezersitu ba F-FDTL iha iha sentru treinamentu Metinaru<sup>7</sup>, no halo mós kooperasaun ho nasaun Filipina, hodi haruka membru F-FDTL nain sanulu ba estuda pilotajem iha Filipina.<sup>8</sup> Prioridade formasaun ba membrus F-FDTL sira ne'e iha parte rua, ba dahuluk atu hasa'e sira nia kapasidade atu bele hatene halo servisu no seluk tan atu hetan promosaun ba sira nia kareira. Tuir eis Chefe Estadu Maior Jeneral da forsa armadas katak iha Tinan 2011 membru F-FDTL hamutuk hat nulu resin maka hetan formasaun iha rai liur, sira ne'e espala iha Brazil, Portugal, Japaun, Xina, Estadus Unidus, Australia, Filipina no mos Nova Zelandia.<sup>9</sup> Dezenvolvimentu rekursu umanu mos hanesan prioridade atu kompleta ezijenisia hodi servi instituisaun F-FDTL tanba instiutisaun ne'ebé forte no militar ida diak tenki disiplina, iha kompetensia no matenek.

Formasaun ba militar governu trasa politika koperasaun bilateral ho nasaun Portugal iha seitor defeza, foka liu ba area ezexito hodi fo formasaun baziku ba soldadu, formasaun kuadrus ba sarjentu no ofisiais, treinu avansadu, kursu sarjentu ba oficial komandu no kursu estadu maior henesan ba Jenerais nian.<sup>10</sup>

Iha mos formasaun iha area engenharia ne'ebe kapasita husi forsa Australia no forsa Amerika iha Sentru Formasaun Metinaru, atu nune'e bele fasilita servisu koperasaun sivil militar nian. No formasaun ba diviza ne'ebé foin lalais iha laron 1/8/2012, Membru offisias F-FDTL husi postu Tenente hamutuk nain rua nulu resin lima, hahu tuir formasaun hodi sae diviza ba kapitaun, liu husi instruktur husi Portugal ne'ebé durante ne'e hala'o knaar iha Sentru Formasaun Nicolau Lobato, Metinaro.<sup>11</sup>

<sup>5</sup> <http://temposemanaltimor.blogspot.com/2008/10/tempo-semanal-edisaun-108.html>

<sup>6</sup> Mahein Nia Lian Nu. 18, 18 1bril 2011

<sup>7</sup> Jurnal Defeza nasional,, Edisaun Dezembru 2010-Junu 2011, pag 16

<sup>8</sup> Jurnal Defeza nasional,, Edisaun Dezembru 2010-Junu 2011, pag 15

<sup>9</sup> <http://timorlorosaenaodiario.blogspot.com/2011/02/komandante-ffdtl-sistema-edukasaun-ih.html>

<sup>10</sup> Mahein nia Hanoin No.2, Politika Ministerio Defeza no Seguransa 2007-2012, pag8

<sup>11</sup> <http://thetimornews.com/news/405-tenente-f-fdtl-nain-25-tuir-formasaun-kapitaun.html>

Xefi Estado Maior F-FDTL, Brigadeiru Jeneral Filomino Paixão esplika kata objektivu formasaun ne'e atu hasa'e kapitaun sira nia kapasidade ho adekuadu, efisiensia ba F-FDTL sira nia konêsementu para aban bairua sira bele komanda kompañia sira nu'udar kapitaun ne'ebé maka disiplina, formadu no kualidade para bele ejerse sira nia funsaun iha futuru.<sup>12</sup>

Iha parte seluk governu mos kria koperasaun ho nasaun sira seluk, hanesan nasaun Portugal, Amerika, Japaun, Malazia, Brazil Indonesia no seluk tan atu nune'e bele haruka membru F-FDTL sira ba tuir formosaun iha nasaun sira ne'e atu bele kapasita sira nia an nu'udar forsa ne'ebé profesional. Formasaun sira ne'ebé durante ne'e hetan husi membru F-FDTL iha nasaun sira ne'e maka hanesan formasaun ba kuiñesimentu militar, doutrina militar, siensia militar, stratejika, administrasaun, inklui mos pilotizmu<sup>13</sup>.

Maske membru F-FDTL sira ne'ebe kapasita an ona liu husi formasaun oi-oin, maibe membru balun seidauk hatudu nia profesionalizmu nu'udar forsa ne'ebé kaer disiplina iha servisu militar nian. Ne'ebé ikus mai bele halo povu lakon konfiansa. Ezemplu ida mak kazu Tuan laran, ne'ebe membru F-FDTL na'in lima lori komandante balun nia naran hodi hatudu hahalok la disiplina ba juventude sira.<sup>14</sup>

Kestiona kona-bá problema hahalok la disiplina SED Julio Tomas Pinto hamutuk ho Koronel Falur Rate Laek ne'ebé rensponsabiliza ba centru formasaun wainhira halo vizita ba Fatubesi fo hanoin makâas ba F-FDTL sira ne'ebé halo servisu iha povu nia le'et katak F-FDTL tenke kuda disiplina no hatudu komportamentu iha povu nia leet no SED mos husu ba membru foun F-FDTL katak wainhira hadomi duni forsa, tenke hadia an tuir lei regulamentu F-FDTL.<sup>15</sup>

#### **4. Promosaun**

Iha natureza militar promosaun ba forsa armada nudar lalaok no sasukat ida, ne'ebé bele mede saida maka elementu forsa armada ida halo, no saida mak atinji ona husi nia dedikasaun no obdese ba regulamentu disiplina militar.<sup>16</sup>

Lei Rezime Promosaun Militar nia baze Legal maka Decreto Lei Nù.32/2009 loron 25 Novembru nian. Ho konsidersaun katak Artigu 9 husi estatutu organiku Forsas Armadas Timor-Leste nian, F-FDTL, aprovadu liu husi dekretu Lei Nù.18/2006, loron 8 Novembru, kontempla figura Vice-Xefe Estado Maior jeneral Forcas Armadas nu'udar kolaborador imediatu ba Xefe Estado Maior Jeneral Forsas Armadas, ema ne'e deveres ofisial Jeneral ida.<sup>17</sup>

---

<sup>12</sup> <http://thetimornews.com/news/405-tenente-f-fdtl-nain-25-tuir-formasaun-kapitaun.html>

<sup>13</sup> Debate TVTL, Sala de redasaun, Entre Vice-Chefe Estado Maior General Das Forcas. Brig. Gen Filomeno Paixão hamutuk ho Diretor Fundasau Mahein (FM) Sr. Nelson belo, Kinta 23/08/2012

<sup>14</sup> Jornal independent, Edisaun Nu. 339 loron 6, setembro 2012

<sup>15</sup> Jornal STL loron tersa, 19/10/2010

<sup>16</sup> <http://juliotomaspinto.com/index.php?start=8>

<sup>17</sup> Dekretu Lei F-FDTL Nù.32/2009, loron 25 Novembru, Rezime ba Promosaun jeneral sira ho Titular ba kargu aas militar nian.

Iha mos kondisaun jeral promosaun nian ne'ebé kontempla iha dekretu Lei Nù./2006, rezime promosaun militar nian, Kapitulo II artigu 13, alinea c, mensiona katak kualidade no kapasidade pesoal, intelektual no profisional ne'ebé postu imediatu ne'e rekere.<sup>18</sup>

Iha tinan 2011 liu husi prosesu ne'ebé naruk, Major Jeneral Taur Matan Ruak, anuncia sai lista naran ofisiais, praca ho soldadus maka sei hetan promosaun diviza iha Sentru formasaun Nicolao Lobato Metinaro. Tuir karta No 02/Feb/2011 Tenente Koronel na'in tolu sei sa'e ba Koronel, Maijor na'in tolu ba tanente Koronel, Kapitaun Tanente ida sa'e ba CFR, F-FDTL ninian Kapitaun nain hitu sei sa'e ba Maijor, Primeiru Tenente ba Kapitaun Tenente na'in ida, Tenente na'in sanolu resin sia ba Kapitaun, Segundu Tenente nain haat sa'e ba primeiru Tenente, primeiru sarjentu nain hitu hakat ba sarjante nune'e duni ofisiais F-FDTL ne'ebe hetan promosaun diviza hamutuk 38 no soldadu ida sa'e ba segundu sarjentu no mos soldadu hamutuk lima nolu resin neen hetaan diviza kapo. Nune'e iha loron 02/02/2011 Membru F-FDTL nain 102 maka hetan promosaun.<sup>19</sup> Promosaun ne'ebé hanesan mos halo iha tinan 2012, promosaun ne'e halo ba membru sira ofisiais hamutuk 17 iha palasio Presidencial. Promosaun diviza ne'e kompostu husi Major ba Tenente-Koronel nain 4, Kapitaun ba Major nain 5 no Tenente ba Kapitaun nain 8.<sup>20</sup>

## 5. Fasilidade

Fasilidade no ekipamentu sai mos nu'udar asuntu determinante ida hodi suporta bá dezvoltamentu profesionalizmu serbisu forsa armada nian. Governu liu husi SED iha 2010 entrega fasilidade hanesan kareta bá instituisaun F-FDTL mak eskavator 2 bá kompañia engeneria, kamioneta 2 bá kompañia engeneria, motor patrollamentu 2 bá Polisia Militar, Toyota Fortuna 3 bá komandante komponente sira, Toyota Land Cruiser 8 bá operasaun nian, Toyota Rush 8 bá administrasaun F-FDTL, Toyota Minibus 8 hodi tula forsa sira nomos ekipamentu seluk bá kompañia engeneria nian.<sup>21</sup>

Politika seluk ne'ebé governu realiza hodi kria kondisaun bá instituisaun F-FDTL ne'ebé adekuaudu maka iha 2011 governu liu husi SED propoin tan osan \$. 3.7 Milloens Dollar Amerikanu atu sosa kareta militar, sosa sasan atu tau iha edifisiu foun SED, konstrusaun uma 100 ida komponente naval inklui halo konstrusaun bá postu FALINTIL-FDTL iha fronteira mak hanesan Tunubibi no Fohorem.<sup>22</sup> Husi esforsu no komitmentu governu AMP liu husi SED, hatudu ona vontade política bá dezvoltamentu instituisaun defeza maske esforsu hirak ne'e seidak naton bá nesesidade instituisaun ne'e rasik.

Komponente Naval sai hanesan prioridade dahuluk iha dokumentus estudu 2020, tamba ne'e CEMGFA prioridade servisu dahuluk mak atendentu ba iha servisu komponente naval. Ho razaun ne'e hotu mak Iha loron kuarta 22 Agustu 2012 CEMGFA Maijor Jeneral Lere Anan Timur, husu ba governu atu hola tan ekipamentus hanesan ró patrula 1 no helikoptru 3 atu

<sup>18</sup> Dekretu Lei Nù.../2006 Rezime promosaun Militar, Kapitulo II, Artigu 13, Alinea c.

<sup>19</sup> <http://temposemanaltimor.blogspot.com/2011/02/f-fdtl-neniek-maibe-maibe-hasae-tan.html>

<sup>20</sup> [http://www.youtube.com/watch?v=e\\_dwJtkL4Ec](http://www.youtube.com/watch?v=e_dwJtkL4Ec)

<sup>21</sup> Buletein Defeza Edisaun Dezemberu 2010 – Juñu 2011p12

<sup>22</sup> Media STL, 17 Agosto 2011

nune'e bele fasilita servisu F-FDTL komponente Naval, hodi kontola tasi Timor ne'ebé oras ne'e ameadu tebes ba riku soin. No mos husu ba governu atu tau atensaun nafatin ba ekipamentus logistiku F-FDTL nian, ho razaun tamba ekipamentus logistika iha F-FDTL minimu tebes no sei impaktu ladiak ba servisu F-FDTL.<sup>23</sup>

## **Maijor Jeneral Taur Matan Ruak nia Rezigناسaun**

Maijor Jeneral Taur Matan Ruak didika tomak ona nia vida iha vida militar, hahu husi Timor-Leste nia prosesu ba ukun rasik an durante tinan rua nulu resin hat nia laran. To'o 2001 tranformasaun FALINTIL ba F-FDTL Taur Matan Ruak asume kargu nu'udar Xefe Estado Maior Jeneral das F-FDTL to'o 2011. Razaun fundamental ne'ebé sai hanesan Taur Matan Ruak nia rezignasaun maka tranformasaun lideransa ba jerasaun foun. Desizaun ne'ebe Taur Matan Ruak foti nudar dalam ne'ebe diak, tamba bele fo biban ba foinsa'e sira ne'ebé iha kbiit, no fatin progresu kadernizasaun ba subalternu sira ne'ebé iha instituisaun F-FDTL, atu ida ne'e mos bele lori aspirasaun foun.<sup>24</sup>

### **1. TMR nia Realizasaun**

Eis Major Jeneral Taur Matan Ruak nia mandatu konsege realija duni servisu nudar Chefe Estado maior general forsas armadas (CEMGFA). Ne'ebe ba dahuluk Transforma F-FDTL husi Forsa guerilia mai forsas konvensional. Hafoin tranformasaun F-FDTL Eis-CEMGFA mos kria komponente sira iha F-FDTL mak hanesan Komponente terestre, komponente Naval, Polisia Militar, servisu koperasaun sivil militar no seluk tan.

Atu konsolida fali instituisaun ne'e eis Chefe Estado Maior Jeneral forsas armadas hamutuk ho governu hala'o rekrutamentu ba membru F-FDTL iha tinan 2009 no 2011, no mos halo promosaun ba membru F-FDTL sira iha tinan 2010, 2011, 2012. Alende ne'e iha mos servisu seluk hanesan Infrastrutura ne'ebé sai hanesan dalam ida importante atu dezenvolve instituisaun F-FDTL ne'e ba oin no hare ba progresu nebe la'o dadauk ona mak hanesan; Harii paiol ida ba F-FDTL iha Metinaru; harii armajen rua ba F-FDTL, harii uma naton ida ba unidade lojistika ne'ebé uza ba hanesan komponente apoiu servisu ninian Kuartel, harii Kuartel ba Polisia Militar,<sup>25</sup>

Realizasaun servisu eis komandante Taur Matan Ruak nian, ne'e hanesan faze primeiru ba dezenvolvimentu instituisaun F-FDTL. ne'e iha parte ida, no parte seluk servisu ne'ebe realiza ona hahu husi 2007 to'o 2012, hanesan meius de servisu ida hodi konsolida fali instituisaun F-FDTL, ne'ebe kuaze atu sai rahun iha 2006. Oinsa atu kompleta servisu instituisaun F-FDTL, hodi buka dalam profesionalizmu nian, nune'e bele nafatin konsolida instituisaun ne'e, liu husi servisu sira ne'ebe bele dezenvolve nasaun no povu ida ne'e. liu husi atividade F-FDTL nian, atividade ne'e inklui atividade sivil Militar (CIMIT), no atividade ne'e hanesan prioridade ba daruak planu dezenvolvimentu F-FDTL ne'ebé hatur iha estudu 2020. Servisu sira ne'ebé hatur iha planu dezenvolvimentu estudu 2020 ne'e maka sai hanesan servisu ida ne'ebé Taur Matan

<sup>23</sup> <http://thetimornews.com/component/content/article/97-berita-bahasa/443-maijen-lere-minta-pemerintah-beli-kapal-dan-helikopter.html#comments>

<sup>24</sup> Time Timor, Suara Redaksi, No. 49 Tahun VI September 2011

<sup>25</sup> Mahein nia Hanoin Nu. 2, 6 Agustus, 2012,

Ruak husik hela ba komandante foun, ne'e mos hanesan faze ida hodi dezenvolve F-FDTL atu sai duni forsa ne'ebé konvensional.

## **2. Servisu ne'ebé Maijor Jeneral Taur Matan Ruak husik Hela.**

Transformasaun ba lideransa foun mak sai hanesan razaun fundamental Taur Matan Ruak nian. Alende transformasaun lideransa ba Brigadeiru Jeneral Lere Anan Timur, iha mos servisu ne'ebé Taur Matan Ruak husik hela.

Servisu ne'ebé Eis Komandante F-FDTL husik hela ba komandante foun maka sai hanesan prioridade ba dezenvolvimento F-FDTL nia. Prioridade ne'e, atu orienta esfórsu tomak atu dezenvolve Forsa F-FDTL. Prioridade hat ne'e maka hanesan; Komponente Naval, atividade CIMIT, enjinaria no apoiu ba servisu projeitu kiik dezenvolvimentu, treinu ba ofisiais, no kapasita husi observador militar. No ikus liu mak dezenvolve ita nia Kompania Infanteria no Forsa Terestres, no iha planu tinan 2012 tenke reorienta ona programa sira ne'e iha baze.<sup>26</sup> Prioridade sira ne'e hatudu momoos ba ita katak unidade, no sa'ida maka ita tenke dezenvolve prioritariamente. Ida ne'e maka orientasaun no prioridades ne'ebé instituisaun F-FDTL iha, hodi konduz esfórsu tomak atu dezenvolve fila fali Forsa iha tinan hirak ne'e nia laran, hodi nune'e bele konsolida no hametin liu tan servisu instituisaun F-FDTL ne'e iha futuro.

## **Komandante Foun nia Vizaun ba Instituisaun F-FDTL**

### **1. Instituisaun**

Iha Komandante foun F-FDTL nian vizaun katak Forsa F-FDTL agora la'os atu halo funu konvensional maibe oinsa atu kontribui ba dezenvolvimentu nasional. Tuir komandante jeral F-FDTL katak, F-FDTL laos deit orienta ninia atividade tuir mandatu konstitusional maibe orienta mos ninia servisu tomak ba atividades interese ema barak nian hodi asegura estabilidade, dezenvolvimentu no prosperiedade povu Timor-Leste ninian, no atu bele hadia fali instituisaun ne'e maka ita tenki fila ita nia forsas armadas sai fali hanesan ikan, para ita nia forsa besik liu ba povu, servisu hamutuk ho povu, moris hamutuk ho povu, han hamutuk ho povu no serbi ba povu.<sup>27</sup>

Tanba ne'e iha kontiudu estudu "Forsa Vinte-Vinte" prioridade ba area hat maka premeiru siguransa maritima, segundu atividade *CIMIC* (Civil Militar Coperation) foka projetu dezenvolvimentu, apoiu umanitaria, terseiru formasaun espesialista, kuartu komponenti terestre.<sup>28</sup> Vizaun ne'e implementa ona iha servisu militar hotu inklui atividade *CIMIC* ne'ebe nia rezultadu maka hanesan konstrusaun ba eskola primaria Fatubesi, distritu Ermera iha tinan 2010 no seluk tan. Prioridade area hat ne'e mak sai hanesan vizaun CEMGFA nian hodi dezenvolve instituisaun ne rasik.

Vizaun CEMGFA Major Jeneral Lere Anan Timur nian ba futuro, katak persiza atu hametin liu tan siguransa no defeza soberania nasaun ida ne'e, iha parte maritima. Tuir CEMGFA ne'e

<sup>26</sup> <http://temposemanaltimor.blogspot.com/2010/08/taur-ezekusaun-kapital-dezenvolvimetu.html>

<sup>27</sup> <http://temposemanaltimor.blogspot.com/2008/10/tempo-semanal-edisaun-108.html>

<sup>28</sup> <http://cjitl.org/cjiltimor-today/cjiti-flash/315-nplanu-forsa-2020-fm-husu-profesionalizmu-f-dftl>

hateten katak Timor-Leste nasaun ida kiik no hadulas husi tasi, tamba ne'e presiza atu hametin liu siguransa iha parte maritima. Ho vizaun sira ne'e hotu, maka CEMGFA husu ba governu atu hola tan ró patrulaha ida no helikoptru rua atu nune'e bele fasilita F-FDTL hodi halo patrulamentu iha tasi laran.<sup>29</sup> Vizaun ne'e hato'o husi CEMGFA Major Jeneral Lere Anan Timur, hafoin hasoru malu ho Prezidente da Republika iha palasiu prezidensial, iha loron 22 Agustu 2012.

CEMGFA mos salienta liu tan kona-bá rekursu umanu katak ba oin programa treinamentu no formasaun edukasaun militar tenke nafatin hala'o iha institusaun F-FDTL atu nune'e bele kapasita nafatin membru F-FDTL sira atu sai forsa ne'ebé professional no modernu.<sup>30</sup> Iha vizaun komandante foun ne'e mos nafatin reforsa koperasaun militar ho nasaun sira seluk, inklui mos nasaun viziñu hanesan Indonezia.

## 2. Koperasaun Sivil Militar

Koperasaun Sivil militar ne'ebe hala'o husi enjenharia F-FDTL sira sai hanesan propriedade número 2 ba dezvoltimentu F-FDTL ne'ebé estabese iha estudu planu 2020.<sup>31</sup> Atividade civil militar ne'e ba projetu kiik dezvoltimentu nian atu nune'e forsas armada bele kontribui mos iha area parte nasaun sira seluk nia kontijentes, para bele fó kontribuisaun ba operasoeins da paz. Em terseiru lugar, provavelmente, ita bele iha rasik ita nia kontijente. Mas ne'e prosesu ida ke lori tempu barak.<sup>32</sup> Ho atividade ne'e bele dezvoltolve povu nia moris iha baze.

Tuir Fundasaun Mahein nia hare katak operasaun Sivil Militar (SMIT) nu'udar misaun importante iha sosiedade nia leet tanba atividade CIMIT ne'e sei dezvoltolve iha seitor infraestrutur, edukasaun, fo asistensia saúde, no seluk tan ne'eb'e maka ba oin sei garantia futuru nasaun ne'e nian. Progresu ne'ebé la'o dadauk Kompañia Enjeneria nia papel importante iha sosiedade nia leet maka hanesan hala'o konstrusaun ba Eskola Primaria Fatubesi-Distritu Ermera iha tinan 2010.

## 3. Misaun Umanitaria

Apoi uumanitariu. Prioridade Numeru 3 ita konsentra ba fómasaun de espesialistas para bele partisipa iha misoeins de apoiu da paz. Ita nia estratejia ba ita nia kontribuisaun ba misoeins da Paz ne'ebé asenta iha aspeitu tolu importantes. Dahuluk, Timor-Leste hakarak iha (ema), kontrui ema ba observadores militares. Tuir mai, *a mediu prazu*; ita hakarak kontribui efektivus ke ki'ik mas halo parte nasaun sira seluk nia kontijentes, para bele fó kontribuisaun ba operasoeins da paz. No ikus liu, provavelmente, ita bele iha rasik ita nia kontijente. Mas ne'e prosesu ida ke lori tempu barak maibe prioridade número 3 ba F-FDTL, no prioridade ida seluk maka siguransa fronteira.<sup>33</sup>

<sup>29</sup> <http://thetimornews.com/component/content/article/97-berita-bahasa/443-maijen-lere-minta-pemerintah-beli-kapal-dan-helikopter.html#comments>

<sup>30</sup> <http://thetimornews.com/component/content/article/97-berita-bahasa/443-maijen-lere-minta-pemerintah-beli-kapal-dan-helikopter.html#comments>

<sup>31</sup> <http://temposemanaltimor.blogspot.com/2010/08/taur-ezekusaun-kapital-dezenvolvimetu.html>

<sup>32</sup> Media Diario Nasional, Loron Sexta 26/11/2010

<sup>33</sup> <http://temposemanaltimor.blogspot.com/2010/08/taur-ezekusaun-kapital-dezenvolvimetu.html>



Liu husi estadu amigu sira hanesan Portugal kontinua halo promosaun forsa defeza Timor-Leste ne'ebé integra forsa F-FDTL iha kontijenti forsa Portugal nia partisipa ona iha misaun umanitaria no manutensaun da paz nia iha Libanon. Hanesan misaun ne'ebé premeira-ves F-FDTL hala'o iha rai liur.<sup>34</sup> Iha vizaun F-FDTL nia, papel forsa armada agora dadaun no ba futuru la'os halo funu konvensional maibe oinsa fo kontribuisaun ba dezenvolvimentu estadu nian. inklui mos fo prioridade makáas ba misaun umanitaria.<sup>35</sup>

Iha kazu seluk ne'ebé F-FDTL hala'o misaun umanitaria iha tinan 2007, ne'ebé forsa F-FDTL hala'o iha distritu Viqueque, Baucau no Lautem. Sai hanesan atividade importante ba forsa F-FDTL, ajuda comunidade halo uma, no apoiu sira seluk ne'ebé comunidade sira momentu ne'eba nia uma sunu, lakon nia riku soin nu'udar kauza husi eleisaun prezidensial no parlamentar tinan 2007 ne'ebé apoiante husi partidu seluk la simu rezutadu votasaun.

#### 4. Harii Komponente Aeru

Tuir planu sei harii komponente aeru ho kuantidade kompañia ida deit ho membru hamutuk 115 to'o 130 deit. Despozitu maka forsa ne'e sei fahe ba seitor norte no sul. Nune'e mos sei harii kuartel komponente apoiu ba serbisu no komponente apoiu aeru iha Baucau.<sup>36</sup>

Komponenti apoiu aeru F-FDTL governu hahu dadauk preparasaun rekursu umanu ba komponenti ida ne'e, bolseiru husi F-FDTL oras ne'e hala'o hela estudu pilotu, pilotu enjeneria, pilotu enjeneria mekanika no pilotu enjeneria elektronika iha Filipina. Atu kompleta planu ida ne'e ba futuru, iha Novembru 2010 governu asina akordu ho governu Republika Federativa Brazil ba apoiu komponente aeru F-FDTL iha futuru no governu Brazil konkorda atu ajuda harii komponenti aeru iha F-FDTL. Tuir Sekretariu Estadu Defeza Julio Tomas Pinto katak Brazil konkorda no apoiu ajuda atu hari komponenti aeru, konkordansia ne'ebé surfreza no lalais no Brazil hanesan nasaun ne'ebé iha Amerika Latina iha teknolojia aeronotika ne'ebé modernu purtantu ita nia koperasaun ho Brazil diak tebes para iha futuru ita bele iha kbiit para kontrola no defeza aeru iha Timor-Leste.

Komponente aeru ne'e hanesan komponente *multiuse*, signifika katak komponente ne'e sei halo servisu iha area oin-oin, tamba ne'e wainhira komponente funksiona, bele hetan failansu, tamba kestaun problema la'os deit ona siguransa, maibe ekonomia, saúde no seluk tan mak sei involve iha servisu ne'e.<sup>37</sup>

Tuir Fundasaun Mahein (FM) hare katak normalmente iha nasaun ida presiza harii komponente aeru, maibe governu iha osan ka lae atu hola aviaun? Aviaun hira maka ita sei sosa, no oinsa manutensaun no operasaun?

---

<sup>34</sup> Timor Post. Sabadu, 21 Jullu 2012

<sup>35</sup> Media Diario Nasional, Loron Sexta, 26-11-2010

<sup>36</sup> Mahein Nia Hanoi 02, 06 Agostu 2012, Política Ministériu Defeza no Siguransa Periodu 2007 – 2012

<sup>37</sup> Sala de Redação, TVTL. Sr. Vice CEMGFA Brig.Gen. Filomeno Paixao no Diretor FM Sr. Nelson Belo, kinta, 23/08/2012

## Militar Obrigatoriu

Iha Artigu 2 Lei servisu militar nian hateten katak, "servisu militar iha karakter universal iha faze resenseamentu nian no timor-oan hotu-hotu iha tinan husi 18 to'o 30, bele simu orden halo servisu militar nian no kumpri hodi halo servisu militar no kumpri ho obrigasaun militar".<sup>38</sup> Estadu Demokratika Timor-Leste, liu husi komandu F-FDTL tuir planu sei aplika sistema militar obrigatoriu durante tinan tolu ka hat, no agora hein deit desizaun husi parlamentu nasional atu aprova lei sistema militar obrigatoriu ba joven sira atu nune'e bele aprende vida militar ninian.<sup>39</sup> Planu ne'e mos hanesan komprimisiu Prezidente da Republika nian, iha momentu kampaña presidencial.

Planu implementasaun militar obrigatoriu ne'e mos hetan apoiu husi membru parlamentu nasional, Deputadu David Diaz Ximines, husi Bankada FRETILIN katak sistema militar obrigatoriu ne'e atu eduka ema sai ema, no joven ne'ebé tama, sei aprende formasaun barak iha instituisaun militar, entaun karik sai husi forsa, pesoal nia komportamentu diak, governu sei kontinua presiza. Kona-bá lei karik prosesu militar obrigatoriu ne'e positivu atu establese ona maka parlemetu sira sei prontu atu diskuti, tamba ne'e benefisiu ba joven sira<sup>40</sup>

Koronel Falur Rate Laek mos hateten estadu Timor Leste liu husi komandu F-FDTL, tuir planu sei aplika sistema militar obrigatoriu ba joven sira para hodi aprende vida regular iha militar ninian, no agora sei hein Parlamentu Nasional atu halo no aprova lei ida kona-bá militar obrigatoriu.<sup>41</sup>

Atu implementa sistema ne'e, Prezidente República Taur Matan Ruak, diskute hamutuk ona ho area profesional sira hanesan SEFOPE, atu nune'e bele sira ne'e mos bele involve iha prosesu implementasaun militar ne'e, ho razaun tamba implementasaun militar obrigatoriu ne'e sei iha atividade rua mak sei involve iha ne'e, katak dader fo sira hanesan disiplina militar no lokraik sira bele tuir kursu hanesan sentru formasaun sira ne'e, halai liu profesional ka skill ida-idak ninian.<sup>42</sup>

Fundasaun Mahein (FM) agora daduk seidauk foti nia pozisaun kona-bá sistema militar obrigatoriu tamba agora dadaun política ida ne'e seidauk fo sai kompletu no seidauk iha maturidade. Fundasaun Mahein nota ona opiniaun barak ne'ebé fo sai ona kona-bá política militar obrigatoriu no rekuiñese mos katak sei iha possibilidade para atu hetan komprimisu balun para atu satisfeita opiniaun hirak ne'ebé kontra no apoiu. Exemplu ida mak hanesan halo rekrutamentu nasional mais labele limita deit servisu ba iha militar maibe fo mos opsau seluk hanesan agrikultura, infra-estrutura, dezvoltamentu ekonomia nomos militar.

Nune'e mos Fundasaun Mahein hakarak fo sai katak sistema servisu militar obrigatoriu ne'e komplikadu liu tanba foinsae sira iha Timor barak tebe-tebes nomos populasau sira tenke iha

---

<sup>38</sup> Dekreto Lei No, 2007, Lei Servisu militar nian, Artigu 2, Pag1

<sup>39</sup> Timor post, kinta, 20 Setembru 2012. Pag.3

<sup>40</sup> Timor post, Kuarta 3/10/2012

<sup>41</sup> Fontes Jornal Timor Post, 20/Setembru/2012, pajina,3

<sup>42</sup> Jornal Nasional Diario, Loron Segunda 01 Outubru,2012

liberdade atu hili opsaun ida ne'ebé mak nia hakarak. Ne'ebé diak liu, se bele, uza deit sistema servisu militar voluntariu.<sup>43</sup>

### **Kontrola no Jestaun Kilat**

Kilat sai hanesan meius ida ne'ebé importante tebes ba militar sira, hodi sata netik ameasa oin-oin. Maibe kilat mos sai amesadu tebes ba comunidade sira nia vida, wainhira komandu la halo kontrolu ka maneja kilat ho diak. Kazu konkreta ida mak akontesimentu iha loron 05 Setembru 2010 Membru F-FDTL husi Polisia Militar lori kilat tiru hasoru maluk PNTL sira iha Likisa.<sup>44</sup> No mos kazu Tuana-Laran ne'ebé membru F-FDTL na'in lima baku joven ho naran Maximianu iha loron 01 Setembru 2012.<sup>45</sup>

Tuir FM nia hare, nota problema hirak ne'ebé akontese impaktu husi failansu iha jestaun kilat, tanba ne'e instituisaun presiza liu atu tau atensaun ba iha jestaun kilat no mos ekipamentu militar sira seluk no haforsa kontrolu kilat sira no kilat uza iha tempu servisu deit. Instituisaun presiza fortifika implementasaun lei no disiplina elementu forsa armada nian iha sosiedade nia leet.

### **Konkluzau**

Liu husi servisu no esforsu tomak husi instituisaun ne'e rasik konsege duni konsolida fila fali instituisaun ne'ebé kuaze atu rahun iha krize militer ne'ebé ekontese iha tinan 2006. Liu husi esforsu sira ne'ebé maka halo husi F-FDTL bazeia ba lei hotu ne'ebé regula servisu institusaun ne'e rasik ne'ebé kria husi IV Governu Konstitusional, konsege hetan solusaun positivu ba problema 2006.

Iha parte seluk ida ne'e nu'udar sinal fiar nian husi povu internasional ba instituisaun F-FDTL, tamba ne'e ita tenke valoriza fiar ida ne'e no responde fiar ne'e ho fornese profesionalizmu no disiplina.<sup>46</sup> Hare ba servisu sira ne'e tomak governu liu husi SED iha favorese atu fasilita nafatin servisu ne'e ba oin no kontinua fortifika disiplina militar ba membru sira, atu nune'e mundu internasional bele fo nafatin nia konfiansa ba instituisaun ne'e.

---

<sup>43</sup> <http://www.fundasaunmahein.org/2012/03/20/militar-obrigatoriu-pro-kontra/>

<sup>44</sup> Timor Post, Loron Tersa 07/09/2010

<sup>45</sup> Timor post Loron Tersa 04/09/2012

<sup>46</sup> <http://www.fundasaunmahein.org/2012/08/17/halo-tinan-ba-dala-37-falintil-luta-foun-ba-dezenvolvimento/>

## Rekomendasaun

1. Rekomenda ba governu liu-liu SED katak persija atu tau atensaun ba ekipamentu no material ne'ebé F-FDTL presiza.
2. Rekomenda ba governu foun katak, servisu militar obrigatoriu ne'e komplikadu tebes, tan ne'e FM rekomenda uza deit sistema servisu militar voluntariu.
3. Rekomenda ba governu liu-liu SED katak haforsa liu tan atividade CIMIT, atu nune'e atividade CIMIT ne'e bele kobre treze distritu laran tomak.
4. Rekomenda ba governu katak' wainhira atu harii komponente aeru tenke bazeia ba estudu ida ne'ebé kle'an.
5. Rekomenda ba F-FDTL katak presiza liu atu tau atensaun ba iha jestaun kilat no mos ekipamentu militar sira seluk no haforsa kontrolu kilat no kilat uza deit iha tempu servisu nian.
6. Rekomenda ba Komandu F-FDTL katak persiza atu fortifika implementasaun lei no disiplina ba elementu forsa armada nian iha sosiedade nia leet.

## Referensia:

### Documentu

Konstituisaun RDTL

Lei Organiku Estatutu Defeza Nasional, Dekreto Lei Nù. 12 / 2010 26 agosto 2010

Lei Nù.16/2008, 24 Dezembru, Alterasaun ba dala uluk Lei servisu militar nian, Lei Nù. 3/2007, 28 fevereiru, Lei servisu military nian.

Lei organika servisu militar nian, Artigu 2. Nù /2007  
Dekreto Lei N<sup>o</sup> /2006, Lei estatutu Defeza Nian

Lei Rezime Promosaun Militar nian Dekreto Lei Nù.32/2009 , Ioron 25 Novembru, Rezime ba Promosaun Oficial jeneral sira ho titular ba kargu aas militar nian.

Lei Rezime Promosaun Militar, Dekreto lei Nù /2006, kapitulu II, militar sira nia kualifikasaun atu hetan promosaun, artigu 13 kondisaun Jeral promosaun nian. Alinea c.

Dekretu Lei Nu/2007 lei servisu milita nian, Kapitulu II Rekrutamentu militar, seksaun II Rekrutamentu Artigu 10.

Mahein Nia Lian N<sup>o</sup> 18 abril 2011. Mehi ho Realidade atu Dezemvolve F-FDTL

Relatorio Fundasaun Mahein Nù. 2, 06 agostu 2012, pag 2

### Media

Debate TVTL, Sala de redasaun, Entre Vice-Chefe Estado Maior General Das Forcas. Brig. Gen Filomeno Paixão hamutuk ho Diretor Fundasau Mahein (FM) Sr. Nelson belo, Kinta 23/08/2012

Suara Timor-Lorosa'e, Kinta 09/07/2012.

Journal Diario Nasional, sexta 6,11,2011

Timor-post kinta, 20 september 2012, pag 3

Time Timor, No. 56 Tahun VI Agustus 2012 pag 8

<http://www.Fundasaunmahein.org/2012/03/20/Militarobligatorio-obrigatorio-Pro-Kontra>

<http://www.fundasaunmahein.org/2012/08/17/halo-tinan-ba-dala-37-falintil-luta-foun-ba-dezenvolvimento/>

<http://cijtl.org/cijltimor-today/cijtl-flash/315-nplanu-forsa-2020-fm-husu-profesionalizmu-f-fdtl>

<http://tniad.mil.id/index.php/satuan/badan-pelaksana-pusat/2012-07-18-04-15-11/dinas-penerangan/militer->

<http://temposemanaltimor.blogspot.com/2010/08/taur-ezekusaun-kapital-dezenvolvimetu.html>